

Tilskot til sikring og istandsetjing av verna fartøy

Fartøy utgjer ein viktig del av den norske kulturarven. Sogn og Fjordane fylke har fleire verneverdige fartøy.

Fartøyvern er eit fagområde der frivillige, lag og organisasjonar har teke på seg eit stort fagleg og økonomisk ansvar. Tilskotsordninga for fartøyvern er eit bidrag frå det offentlege for å støtte opp under dette arbeidet. Halvparten av midlane er løyvt av Sogn og Fjordane fylkeskommune, resten av Riksantikvaren.

Kven kan søkje

Målgruppa for ordninga er eigarar og forvaltarar av flytande kulturminne i Sogn og Fjordane. Kommunar, foreiningar, stiftingar, andre samanslutningar og private kan søkje. Fartøya må ha heimeadresse i Sogn og Fjordane. Etter nærare vurdering kan kravet fråvikast dersom fartøyet har størsteparten av seglingstida si i fylket. Det kan berre søke tilskot for fartøy som har fått tildelt status som verneverdig av Riksantikvaren.

Kva kan støttast

Sikring og istandsetjing av fartøy med heimeadresse i Sogn og Fjordane, som har fått tildelt status som verneverdig fartøy av Riksantikvaren.

Følgjande vilkår må vere oppfylte for at tilskot skal kunne tildelast:

- Tiltaket må liggje innanfor og bidra til å realisere føremålet med ordninga.
- Det vert ikkje gitt faste/årlege tilskot til drift.
- Tilskot til tiltaket skal normalt ikkje overstige 50 % av kostnadene. Ved særlege høve kan administrasjonen fråvike dette kravet.
- Status på tiltaket må meldast tilbake innan utgangen av tildelingsåret.
- Det kan ikkje tildelast tilskot til fartøy som staten eller fylkeskommunen er eigarar av.

Føremål med ordninga

Målet med tilskotsordninga er å sikre og setje i stand fartøy i Sogn og Fjordane for vidare bruk, og som grunnlag for kunnskap, oppleving og verdiskaping.

Ytterlegare moment ved vurdering av søknad

Løyving av tilskot til søknader som fyller grunnvilkåra byggjer på ei heilskapleg vurdering med utgangspunkt i føremålet med ordninga. Det vert mellom anna lagt vekt på følgjande moment (i uprioritert rekkefølge):

- Kulturminnet sin kulturminneverdi og viktigheit av tiltaket
- Søkjar sin kompetanse og gjennomføringsevne
- I kva grad tiltaket kjem ålmenta til gode
- Kor representativt fartøyet er

Søknadskrav, sakshandsaming og vedtak

Søknaden må innehalde tilstrekkeleg informasjon/dokumentasjon og minst gjere greie for følgjande:

- Fartøyet sin kulturminneverdi
- Trongen for tiltaket
- Val av løysingar
- Plan for gjennomføring
- Finansieringsplan og budsjett
- Dokumentasjon på at naudsynt myndekrav for tiltaket er oppfylt
- Effekt av tiltaket for ålmenta

Søknaden skal vere signert av ansvarleg søker. Dersom andre enn eigar er søker, skal søknaden også vere signert av eigar eller rett representant for eigar. Dersom søknaden er mangelfull, kan det verte høve til å rette dette innan ein nærare fastsett frist. Dersom manglane ikkje er retta innan fristen, kan søknaden verte avvist.

Oppfølging, rapportering og kontroll

Søkar skal rapportera status innan utgangen av tildelingsåret og endeleg rapport må innleverast innan 15. november seinast to år etter at løyvinga er gitt.

- Rapporten skal innehalde:
- Utgreiing av gjennomførte tiltak og eventuelle avvik frå planen for tiltaket
- Rekneskap m/oversikt over kostnader og finansiering
- Dokumentasjon i form av foto eller liknande

Søkar skal varsle fylkeskommunen dersom det oppstår vesentlege avvik frå prosjektplanen i prosjektperioden.

Fylkeskommunen og fylkeskommunen sin revisor skal ha rett til tilkomst til tiltaket(fartøyet) og innsyn i rekneskap og dokumentasjon i slik grad som fylkeskommunen og revisor finn naudsynt av kontrollomsyn. Brot på krava til rapportering/kontroll kan føre til at utbetalingar vert haldne attende og at vedtaket om tilsegn vert gjort om heilt eller delvis.

Misleghald

Dersom tiltaket ikkje vert gjennomført skal midlane førast attende til fylkeskommunen. Dersom det ligg føre vesentlege avvik frå prosjektsøknaden, kan vedtaket om tildeling verte gjort om heilt eller delvis. Pengane kan i så tilfelle krevjast ført attende heilt eller delvis.

Klage

Vedtaket kan klagast på i medhald av forvaltningslova § 28. Klagenemnda for Sogn og Fjordane fylkeskommune er Fylkesutvalet. Klage vert sendt til Sogn og Fjordane fylkeskommune, Nærings- og kulturavdelinga. Klagefrist er 3 veker frå søker fekk kjennskap til vedtaket.

I Sogn og Fjordane fylkeskommune si underretning til søkerane om vedtaket skal det mellom anna opplysast om moglegheitene for å klage, klagefrist og partsinnsyn mv., jf. forvaltningslova § 27 tredje ledd.